

安南縣志稿

二

安南縣志稿卷三

兵事志

明洪武十四年征南將軍傅友德都督景雙鼎克普安部

按是年秋友德為征南將軍帥副將軍藍玉沐英將兵

三十萬趨貴州十月與安慶侯仇成永甯侯張銓普定

指揮顧成及黃昱等由普定進克普安

明史云十月克通志云十二月克

克今從明史

降諸苗進攻曲靖烏撒循格孤山而南以通永

甯留兵戍守普安平普安諸苗仇成張銓之功居多顧
成則率師先入今之安南境平定阿黑等十餘寨又連

景帝景泰元年安南指揮蕭能普安土判官隆本平安南
苗

按是年總兵梁珪檄普安土判官隆本率土官援安南
師至安南安南衛指揮蕭能出城夾攻擒賊首二斬七
千餘級賊據紫塘總督侯璉自帥師攻之隆本克十餘
寨降阿蒙等五寨隆本慈長之四世孫也世襲土判官
事平叙功升鎮遠同知仍世襲土判官

見明史
及通志

孝宗弘治十一年普安土判官隆暢妻米魯與其營長阿
保反于安南城外築阿先寨與阿保圍暢之妻及子于安

南名己所居寨為承天寨自號無敵天王出入建黃纛御
史張淳令捕之不克孝宗令沐國公沐崑發十衛官軍及
諸土兵萬有奇分道進兵責米魯之父安民殺賊自贖安
民乃攻斬阿保于查刺寨沐崑擊米魯破之米魯遁見明史及

通志

是年按察使劉福討米魯敗于安南之阿馬坡

按是年東甯伯總兵焦俊奏賊據苗寨百有奇殺官及
兵民無算米魯尚匿安民家宜責安民勦餘賊獻米魯
安民承命佯進勦陰予米魯兵襲殺暢之妾與子又密

遣營長福祐助米魯據別寨米魯投牒請襲女土官巡撫錢鉞副使周鳳都指揮劉英吳達太監楊友總兵焦俊等皆受米魯賄請宥罪聽襲巡按黃珂劾鉞俊俊得罪以曹愷代嚴旨責鉞等必得米魯而後已按察使劉福自詭知兵進勦營於安南之阿馬坡即今之哈馬坡又名下馬坡而移文取賂賂故緩師期賊薄官軍官軍大敗都指揮吳達被執普安幾陷

見明史通志普安州志及舊志

十三年命戶部尚書王軾討米魯

按是年命南京戶部尚書王軾督貴州軍討之見明史

是年米魯攻圍普安安南二衛布政使閻鉦按察使劉福副使周鳳都指揮吳達指揮史韜李雄郭仁李宗武皆死之

按王軾軍未至太監楊友等遣人招撫賊揚言欲降悉眾攻圍普安安南二衛斷盤江道襲殺劉福周鳳吳達執楊友于是右布政使閻鉦通志作閻鉦舊志作閻鉦指揮史韜李雄郭仁李宗武皆戰死見明史通志普安州志及舊志

十六年王軾討米魯平之

按是年王軾至帥都指揮張泰李政總兵曹愷都督王

通參將趙晟等以便宜調楚粵滇蜀官軍土軍兵八萬
合貴州兵分道進剿奪楊友還參將趙晟破六陸賊賊
遁渡盤江都指揮張泰指揮劉懷進解安南圍總兵曹
愷都督王通都指揮李政亦各敗賊于是阿舊阿滿阿
黑等二十餘寨皆破

見明史通志興義府
普安州志及舊志

武宗正德二年沐國公沐崑破賊阿本于盤江

按是年阿本作亂崑伏軍盤江截賊巢大破之

見明史

七年沐崑討擒安南長官司那代

按是年安南長官司那代爭襲殺土官崑討擒之

見明史

神宗萬曆三十八年安南毛口苗叛巡撫胡桂芳討平之

按是年毛口苗老光四老應揚等作亂恣殺掠巡撫胡

桂芳討平之

見舊志

四十七年安南毛口苗復叛參政謝存仁等勦平之

按是年毛口六隆賊老光四等又據險反永甯州知州

毛宗養時移駐安南城請大吏兵勦巡撫張鶴鳴檄參

政謝存仁帥安南守備許成名安南指揮梁東旭率漢

土兵勦平之

見舊志

熹宗天啟二年水西叛苗安邦彥遣其黨沙國珍羅應魁

圍攻安南衛永甯州知州薛三桂死之

按天啟元年水西苗安邦彥叛遣其酋沙學等攻據關

索嶺巡撫李樓巡按史永安檄都司許成名等帥兵救

援與之力戰二年正月十七日安氏之黨沙國珍羅應

魁渡盤江圍安南衛是時永甯州知州薛三桂駐安南

與安南守備楊文炳指揮梁東旭都司許成名等堅守

三桂屢與賊血戰力竭死之

見明史通志永甯州志及舊志

是年普安土判官龍文治妻叛應安氏圍普安安南衛陷

新興所安南所

按是時普安土判官龍文治已卒其妻與其黨尹王保
叛應水西安氏圍普安衛城滇撫沈倬使都司李天
常知縣呂聲揚率兵援安南普安解其圍奪還難民千
有奇羅應魁詐降天常信之聲揚諫不聽至安莊次疊
水鋪解甲受降伏起天常與指揮王懋勳張神武皆死
之聲揚與把總劉春元等帥五百人入普安城堅守于
是賊復圍普安安南而陷新興所安南所是年御史傅
宗龍疏言攻圍普安為滇黔門戶患者龍文治妻及其
黨尹王保困安南據關索嶺者沙國珍羅應魁輩臣悉

其生平非臣敵臣願以巡按兼貴州監軍滅此羣醜熹

宗大喜會宗龍以疾歸不果行

見明史通志及舊志

三年普安叛苗陷普安州城布政使謝存仁參將袁善戰敗之又進解安南衛圍復安南所新興所

按是時滇之羅平補鮮苗亦叛三年正月滇撫閔洪學

遣土官沙源等討之四月龍文治妻遣尹王保救補鮮

沙源擊敗之又追擒普安之鼠場女營長安三距安南

不三十里以糧盡退師于是熹宗起傅宗龍為巡按監

貴州軍宗龍即家奉詔自滇起行洪學命布政使謝存

仁土官普名聲等以兵五千送行宗龍等戰且行沿途
破賊已而洪學命參將袁善駐平夷尹王保與補紮苗
攻之妖僧百足以魘魅術殺平夷長官王大慶遂與普
安賊共陷普安州城知州劉世隆保於郊外五月洪學
檄世隆招集普安壯士千人遣守備焦大受率兵五百
助之糴米千石使壯士齎金粟入安南城又令袁善率
守備王聘選等趨新興襲土判官營又令謝存仁率同
知呂聲揚守備沙如玉等出黃草壩襲馬乃營九月初
五日袁善薄土判官營賊使其黨段二禦之聘選戰擒

之賊遁上八塘山攻之不克乃趨援安南安南被圍久
食盡幾陷援兵至又得賑銀千兩慶更生謝存仁至黃
草壩用黃坪營長黃汝桂為導攻馬乃營焚其積聚刻
期以十月初七日會兵於安南之西初十日存仁兵先
至安南圍解十五日分兵復安南所尹王保營於江西
坡十六日夜沙如玉衝陣擊敗之許成名亦自安南出
城夾攻大敗之存仁遂率兵趨新興閏十月初八日存
仁率諸將攻八塘山尹王保殊死戰沙如玉鎗刺王保
墜馬斬之餘賊竄頂屯屯險絕賊攀援上無徑路官兵

仰攻賊下木石官兵多傷翌日復攻破之

見明史通志舊志善安州

志黃氏族譜

四年安南苗平

按是年正月沙國珍羅應魁降已而巡撫王三善為降賊陳其愚所紿敗沒于內莊傅宗龍遣謝存仁等率土兵七百馳赴貴陽擒斬其愚而沙國珍復叛時普安又有哈馬賊千人出圍阿底寨副總兵袁善擊破之尋水西賊攻簸箕營善又擊破之副使楊世賞遂通盤江道總督楊述中又發餉于安南人心始定既而安邦彥統

二十七營犯普安新興四月二十五日至鷄場營袁善
禦之邦彥燒營遁七月僉事段伯炯巡安普始靖謐

見明

史通志舊志
普安州志

六年副監安普軍使朱家民平定安南之盤江諸寨苗建
鐵索橋築五城

按是年安普監軍副使朱家民與參將許成名等討平
盤江阿野魯頗諸寨苗乃相度要害築十一城宿兵以
衛民又以盤江水剽疾不可以舟楫渡昔家民征苗猝
遇苗萬騎來逼宵濟幾溺苗平乃出萬金創建鐵索橋

以濟行人遂為永利

見明史鐵索橋碑

莊烈帝崇禎十二年安南毛口苗反安南指揮尋治本鎮撫余維敬死之

按是年毛口狎家苗挾妖術作亂新添衛指揮龔應龍普定衛參將魏民望安南衛指揮尋治本千戶袁遵明奏膚城鎮撫余維敬率兵勦之為妖術迷亂失利治本維敬戰死應龍敗歸不敢討為害有年

見舊志

十五年毛口苗平以龍祖烈為普安土州同世襲

按是年參將黃坪營長黃汝桂與普安土判官龍祖烈

助平毛口苗叙功升祖烈為土州同世襲見黃龍二氏族譜及興義

府志

清世祖順治四年即明永明王永曆元年流寇孫可望陷安南衛永甯知州曾異撰死之

按是年春流賊孫可望由黔趨滇將犯安南時永甯知州曾異撰駐安南與其客江津進士程玉成貢生龔成勳集衆守城而親率士卒扼守盤江與可望戰於盤江之西軍敗退守城城陷異撰自焚死教授黃士正兵部主事陳某皆死之可望遂屠安南城今異撰墓在安南